



Bann bat

latet pe fel

Nou kontinyen fer rapel lepep Seselwa ki partou kot zot pase, tou devlopman ki zot vwar, ***N***i annan stanp SPUP/SPPF/Parti Lepep lo la. Sa i en fe ki personn pa kapab renye. E letan ki lopoziyon pe fer tou pour demoli tou sa lakonplisman, nou reste fyer e proklanm nou leritaz ek nou lakonplisman. Nou'n fer li pour lepep Seselwa. Me Seselwa, fer atansyon, i annan parmi nou ki'n konmans fer semafot. Pa les glis net akoz nou pa pou kapab reatrape.

I vre ki letan in sanze, e sitiasyon politik in sanze. Me Parti Lepep pou kontinyen milite pour linite nou pep. Pour lape. Pour solidarite ant tou Seselwa. Pour dignite ek prosperite nou nasyon. Nou pou kontinyen milite pour onor nou bann dirizan ki kontinyen travay dir pour Sesel e Seselwa. Nou tir nou sapo ek ansyen Prezidan France Albert René e Prezidan James Michel. Nou siport Prezidan Danny Faure e tou sa ki dan son plan pour Sesel e Seselwa. Nou ankouraz li pour kontinyen travay baze lo bann gran prensip SPUP- lazistis sosyal, loportinite dan legalite, distribisyon larises parmi nou pep e pour toultan protez Seselwa kont menas e rankin lopoziyon ki konn zis detrir olye konstrir. Seselwa in vin en pep entelizan. Menm si an 2016 bokou in ganny

manipile e zot in krwar bann bat latet lopoziyon. La nou pa krwar ki Seselwa pou tonm dan pyez lopoziyon ankor. Prezidan Michel ti dir ki sa viktwar lager antoure an 2016 ti pou en viktwar tanporer ki pa pou dire. Nou'n mark son parol e ozordi nou war son parol vin realite. Zot ti vot pour sanzman e ozordi zot pe ganny sanzman letan ki lopoziyon i koup bidze e retard progre. Letan lopoziyon i enterfer partou, dan travay zidisyer, travay NDEA, Lapolis, en medya ki zot ti dir pa endepandan, zot pe anmenn en kanpany viktimizasyon a nenport Seselwa ki siport Parti Lepep, zot asasin karakter e tret tou dimoun koronpi pour en wi ou en non. Zot penaliz zanfan Seselwa. Zot penaliz travayer Seselwa. Zot pe get zis zot benefis- se pourkwa ki

zot pe rod zis eleksyon pour ganny plis privelez. Konpar tousala ek sanzman ki SPUP/SPPF/Parti Lepep in fer pour Seselwa. Konpar lavi ozordi ek lavi lesklavaz ek lavi anba kolonyal. Kote mazorite nou pep ti ete sa letan la ? Kote zot in ete pandan 40 an ki nou Parti pe travay e anmenn sanzman pozitiv ? Kote nou kapab ete si nou les lopoziyon kontinyen detrir nou bann aki ? Erezman ki Parti Lepep pe tenir e pa pou large. Nou konnen kwa ki priyorite pour Seselwa. Parey i annan en letan pour tou dan lavi ; Parti Lepep osi i konnen ki la nou merit travay pour donn sa pep. Nou en Parti ki lwayal e senser. Nou annan direksyon. Nou annan prensip, Nou annan legzistans 53an.

Pa les zot met bar dan nou larout

Priyorite lepep ansemoman ti merit diskour Leta Lanasyon ki Prezidan Larepublik i fer lo komansman lannen. Lopoziyon in war nesite sanz sa priyorite pour donn plas en eleksyon parsyel. Antretan, lepep i espere pour tann son prezidan pronons li lo plis devlopman dan lasante, ledikasyon, tourism, sekirite, kou lavi, plis benefis pour lafanmir, plis benefis sosyal, plis lakaz, plis lanplwa pour Seselwa, plis benefis pour nou vyeyar,

parmi plizyer lezot. Seselwa i oule war li dan SONA.

Seselwa i oule war son lavi kontinyen amelyore. I pa oule tande ki son pei pe vin pei kot koripsyon i plis akoz lopoziyon pe target nenport ki e kwa par malis. Seselwa i oule viv son lavi dan konfor, e lape. Seselwa in fatige ek politisyen ki oule fors politik dan son lagorz tou le zour.

Gouvernman i oule travay pour permet Seselwa akonpli bokou. Nou tya demann lopoziyon pour aret met bar dan larout Seselwa.

Pour bann zonm ki pe viv dan lopilans. Pour bann ki les zot larogans blyi kote zot ti sorti. Nou tya demann zot pour refleksi, e reflexir byen. En kantite keksoz nepli parey dan sa pei depi Septanm 2016 akoz lopoziyon pa pe anmenn okenn dibyen pour lepep Seselwa. Eski zot oule kontinyen mars ek tousala lo zot konsyans ? Oswa eski zot oule travay akote Prezidan Faure pour reste o servis en pep ki ankor bezwen zot.

Les zot nofrazze

Sa bato ki lopoziyon ti sladan in nofrazze. Abor in annan en lager lekel ki pou anmenn labar. Tou dimoun in oule vin kaptenn, personn pa oule reste en senp manm lekipaz. Ler ou en kaptenn ou

ganny plis privelez. Kaptenn ki donn lord. Seselwa ki ti'n pran en tyak abor sa bato, profite koman bato in nofrazze pour sote. I annan ki byen lontan in sote. I pa tro tar pour larestan swiv.

Seselwa, lopoziyon in kanmi. Zot war zot tousel dan en eleksyon ki pa ti nesaser. En eleksyon ki pou epwiz dan larzan pei- larzan ki Gouvernman i bezwen pour progre Sesel.